

lis Gnovis

■ **JERUSALEM.** Esplorazion in Palestine

E jentre ancje la «Societât furlane di archeologjie», dongje dal Museu de Comunitât ebraiche di Triest «Carlo e Vera Wagner», tal scjap di clapis che, dal mê di Fevrâr al mê di Mai, a proponaran une schirie di convignis par cognossi «Israele: archeologia e storia». Daspò dal apontament dai 8 di Fevrâr sul stât dai sgjâfs archeologjics dal di vuê a Jerusalem, cul archeolic israelian Dan Bahat, si larà indevant ai 15 di Fevrâr («L'assedio di Masada»), ai 15 di Març («La distruzione del Secondo Tempio ad opera di Tito: cause e conseguenze da un punto di vista ebraico»), ai 12 di Avrîl («Filistei: decenni di ricerche in Israele per svelare il mistero della loro identità») e ai 24 di Mai («L'antico Egitto e Israele. La presenza ebraica nella Valle del Nilo secondo le fonti egizie»). Lis lezions a podaran jessi seguidis di persone a 17.30, ma a saran ancje trasmetudis mediant de plateforme informatiche «Zoom» (www.triestebraica.it/it).

■ **PORDENON.**

Altris 5 «Stolpersteine»

Fra chês passe 80 mil «Pieris ch'a fasin colâ» che l'artist todesc Günter Demnig al à bielzà semenât pes stradis di mieze Europe par memoreâ cuntun monument «slargjât e dal bas» i milions di biâts depuartâts tai Lager naziscj (www.stolpersteine.eu/en/home/), a van contadis ancje chês 14 ch'a onorin i prins depuartâts di Pordenon. Nûf a son stadis poiadis tai agns passâts, altris 5 a son stadis zontadis chest an. A son chês ch'a ricuardaran Luigi Antonio Santarossa (1895-1944), te strade Del Fante, e lis strussis di Arturo Biasutti (1905-1945), di Annibale Toffolo (1912-1945), di Antonio (1898-1945) e di Romeo Pilat (1926-1945), te Frazion di Tor. Di chê strade dal «Di de Memorie», tal Friûl occidentâl, si à cjarâr dal «Museo Diffuso delle Pietre di Inciampo» ancje tes Comunitâts di Manià, di Budoie e di Sacil (www.comune.pordenone.it/memoria).

■ **FLAMBRUÇ.** Permaculture e projetazion

Cuntun prin «workshop», ai 26 e ai 27 di Fevrâr, al partissarà li dal «Ecovilaggio Gaia Terra» di Flambruç di Rivignan un cors internazionâl di «Projetazion in Permaculture». La formazion, curade di Ezio Gori, di Debora Sbaiz e di Carmelo Chiaramonte, e larà indevant fin tal mê di Mai, cun lezions «on line» e modui pratics (www.progettogaia.com/event/pdc-72h-stimolare-la-regeneration-1-modulo/). L'accreditament internazionâl dal cors al è garantît di «Permaculture Research Institute» (Australie) e de «Permaculture Association» (Gran Bretagne).

■ **CIMOLAIS.** Lis Dolomiti studiadis

Fra lis 12 tesis di laureade di 9 Universitâts diferentis, presentadis pal concors «Dieci anni di Dolomiti Patrimonio Mondiale Unesco», il zurî, clamât dongje de «Fondazion Dolomiti Unesco» e des istituzions ingaiadis tal projet, al à decidût di premiânt dôs e di segnalânt altris dôs. Une da lis «menzioni speciali» e je lade a Martina Scariot de Universitât furlane, ch'e à concorût cuntun studi su «Il sistema malghivo nel territorio bellunese e la sua evoluzione in ambito turistico». In curt, al saltarà fûr il regolament de edizion dal concors pal 2022.

Mercus 9	S. Polonie vergjine	Domenie 13	VI Domenie vie pal an
Joibe 10	S. Scolastiche vergjine	Lunis 14	S. Valantin martar
Vinars 11	La Madone di Lourdes	Martars 15	S. Faustin vescul
Sabide 12	S. Eulalie martare	Il timp	Cil seren.



Il soreli
Ai 9 al jeve aes 7.19
e al va a mont aes 17.24.



La lune
Ai 16 Lune plene.

Il proverbi
Putrops pôcs a fasin un trop.

Lis voris dal mê
Dispedait lis menadis des vits, spontait
e cimait i pomârs.

Il fisc seont la Biblie

Patrimoni vèr de societât a son lis cussiençis onestis

La int a pairessin vultintîr lis tassîs s'a savessin che il fisc «al zove par superâ lis discriminazions, par fâ invistiments ch'a fasin cressi i puecj di vore, par garantî une sanitât di sest e istruzion par ducj e par creâ servizis ch'a fasin funzionâ la vite sociâl e l'economie»: la recipe di Pape Francesc cuintri da l'evasion fiscâl e je cheste chi e, cence pêl in bocje, le à presentade a la delegazion de Agenzie taliane des jentradis, congregade par une udience speciâl, ai 31 di Zenâr, li de Sale Clementine dal Vatican.

Il discors dal Pape, pandût fûr par fûr sul sfuei «L'Osservatore Romano», al à stât popolarizât di cetancj «mass media», palesant trop delicât ch'al è tocjâ chel cantin, in Italie, dulà che l'evasion fiscâl e je fra i râr «records mondiâi» dal País.

La riflession dal Pape e je partide de Biblie, par po dopo marcâ il valôr e l'utilitât dai trê principis – legalitât, imparzialitât e trasparenze – ch'a ispirin l'Agenzie dal fisc.

Zacheu e Matieu a son i doi spiei proponûts, intant de udience, ai esatôrs talians. Cun di plui, Pape Francesc al à resonât ancje sul valôr de pratiche da lis «decimis», proferide tal libri biblic dal «Levitic». A cheste tasse, ch'e esisteva in cetantis societâts antighis, l'Antic Testament i à dât un significât gnûf, stant ch'e coventave par mantignî la gjernazie dai Levits. «Lis decimis pai Levits – al à dit Pape Bergoglio – a coventavin par insedâ te cussience dal popul dôs vetretâts: di no ritignîsi autosuficenti, parcè che la salvece e ven di Diu; e di vè curie un di chel altri, scomençant di chel ch'al à plui dibisugne».

I principis di legalitât, di imparzialitât e di trasparenze – al à continuât il Pape – a àn di diventâ une «bus-



Pape Francesc

Pape Francesc al à proferit la sô recipe cuintri da l'evasion fiscâl

sule preziose». Massime tal setôr fiscâl, la legalitât «al è un mût par ecuilibrâ i rapuarts sociâi, disvinidrint la coruzion, lis injustizis e lis sperecuazions». Si che, favorint «la redistribuzion des ricjecs e difindint la dignitât dai puars e dai ultins», la tassazion e devente un segnacul di legalitât e di justizie. «Lavorin par ch'e cressi la culture dal Ben comun – al à dit il Pape – e par ch'e sedi tignude cont la destinazion universâl dai bens, ch'al è il prin fin di ogni ben».

Seont Francesc, il lavôr dai scuedidôrs i somee un dovê disgrat a chê societât ch'e calcole «la proprietât private come valôr assolut e che no rive adore di subordenâlu al stîl de comunione e de condivizion pal ben di ducj». Ma, a la barbe dai cês di evasion fiscâl, di paiaments a neri, di ilegalitât corint, «voaltris o podês contâ l'onestât di tancj di lôr che no si tirin indaûr devant da la part dal so dovê e ch'a pain il so vè di dâ, zovant pal Ben comun». Chest «spieli di justizie sociâl» al è un «artesanât dal Ben comun ch'al volarès contât, parcè che lis cussiençis onestis a son

il vèr patrimoni de societât». Par finî il so discors, il Pape al à comentât il principi de trasparenze. «Il fisc al ven calcolât dispès in mût negatîf, cuant che no si capis benon dulà e cemût che la monede publice e ven spindude». Par chel, «cui ch'al messede il patrimoni di ducj al à la grande responsabilitât di no inricjîsi».

«La trasparenze, te gesticion dai bêçs, ur insegue a lis personis a jessi motivadis di plui a paiâ lis tassîs... Nol è facil, ma voaltris o vês di inscuclânu in chest».

Mario Zili

Messe in marilenghe

A Udin, la Messe par furlan e ven cjantade ogni sabide, a 5 e mieze soretere (17.30), li de capele de «Puritât», daprûf dal domo. Sabide ai 12 di Fevrâr al cjantarà messe pre C. Bevilacqua. Radio Spazio e trasmet sul moment, ogni setemane, dute la celebrazion.

Peraulis in dismentie

par cure di Mario Martinis

❖ **SPEGLÂ**

v. = specchio (la voce è da confrontare con l'italiano *specchio*, "specchio", il provenzale *espelh*, da *speculum*)
Ancje la regine si spegle par petenâsi.
Anche la regina si specchia per pettinarsi.

❖ **SPERE**

s.f. = raggio di sole, lancetta dell'orologio (dal latino parlato *spera*, da *sphaera*, dal greco *sphaira* "palla, sfera celeste")
Une spere di soreli e jentre de balconete e e bat sul paviment.
Un raggio di sole entra dal balconcino e picchia sul pavimento.

❖ **SPEZIÂR**

s.f. = farmacista, speciale (dal latino medievale *specialis*, da *species* "droga")
Cun mè sùr o ai di lâ te buteghe dal speziâr pe solite mindusie.
Con mia sorella devo andare nella bottega del farmacista per il solito miscuglio.

❖ **SPI**

s.m. = spiga, spicchio (lâ in spi "perdere")
(dal latino *spīca* e *spīcus*, è da ricordare il latino *ruræ spēca*)
Il forment al è in gosop, ma ancjemò nol à mitût fûr nissun spi.
Il frumento è rigonfio, ma ancora non ha emesso nessuna spiga.

❖ **SPICIGULÂ**

v. = lesinare, cercare il pelo nell'uovo
(da spiccioli "spezzati", senso contrario ricavato da appicciare "unire, attaccare più cose assieme")
No stin a spicigulâ tant sul mangjâ.
Non lesiniamo tanto sul mangiare.

❖ **SPIETE**

s.f. = attesa (dal latino *expectare* "attendere, aspettare", da *speculare* "guardare")
O fâs la spiete al prin cjar che al passe par montâ sù.
Aspetto il primo carro che passa per salire sù.